



**UTM**  
UNIVERSITI TEKNOLOGI MALAYSIA

---

UNIVERSITI TEKNOLOGI MALAYSIA

SEMESTER 2 2023/2024

**ESEI 30%**

---

ULRS1182 – PENGHAYATAN ETIKA DAN PERADABAN

SECTION 27

**PENSYARAH :** ASSOC. PROF. DR. MOHD AZHAR BIN ABD HAMID

NAMA	NO. MATRIK
NUR FIRZANA BINTI BADRUS HISHAM	A23CS0156

## **Tema : Isu-isu akhlak di Malaysia dan Global (800 - 1000 pp)**

### **Tajuk Esei : Krisis Akhlak dan Moral Remaja di Malaysia**

Dalam meniti arus pemodenan, perkembangan teknologi dan sosial telah membawa pelbagai cabaran kepada masyarakat terutamanya golongan remaja. Remaja merupakan aset terpenting bagi memajukan negara dan dapat melahirkan contoh teladan yang baik pada masa akan datang. Akhlak menurut Dewan Bahasa dan Pustaka bermaksud budi pekerti, kelakuan dan tabiat. Akhlak dan moral merupakan satu gabungan yang mampu menjadikan seseorang individu itu mempunyai watak yang baik dan disanjung ramai. Namun, kebanyakan remaja zaman sekarang terlibat dengan perkara-perkara yang boleh mengakibatkan berlakunya keruntuhan akhlak dan moral dalam diri. Sebagai contoh merokok, merempit dan mengambil dadah. Perkara ini mempunyai sebab dan punca tersendiri mengapa seseorang remaja itu boleh terjerumus dalam perkara tersebut sehinggakan akhlak mereka rosak. Kenyataan ini adalah benar dan ia disokong oleh pihak sebelum-sebelumnya. Punca-punca berlakunya permasalahan krisis akhlak dan moral dalam kalangan remaja di Malaysia dan cara menanganinya akan dibincangkan.

Punca berlakunya krisis akhlak dan moral dalam kalangan remaja ialah pengaruh daripada penggunaan media sosial yang berlebihan. Hal ini kerana jika seseorang itu menyalahgunakan kelebihan yang terdapat pada media sosial, mereka akan terjerumus dalam langkah yang salah dan boleh menyebabkan runtuhnya akhlak dan moral. Media sosial digunakan untuk kemudahan berhubung dan cakna tentang informasi terkini. Namun, kebanyakan golongan remaja menyalahgunakannya dan terlibat dalam pelbagai kes yang menyebabkan perilaku mereka berubah secara drastik dan akhlak mereka rosak. Tindakan ini terjadi ekoran terlalu taksu, kecewa atau terpengaruh dengan kandungan di media sosial yang telah menjadi trend. Sebagai contoh, trend buli siber yang berleluasa dalam golongan

remaja. Perkara ini telah mengganggu emosi dan mental mangsa sehingga boleh menyebabkan kemurungan. Pelaku ini telah terpengaruh dengan kandungan media sosial dan menyebabkan akhlak mereka musnah. Oleh sebab itu, langkah menangani perkara ini dari berlaku adalah dengan pengawalan penggunaan media sosial terhadap golongan remaja terutamanya awal remaja. Mereka ini mudah terdedah dengan perkara baharu dan mempunyai rasa ingin tahu yang kuat. Dengan mengawal penggunaan media sosial terhadap remaja, kadar keruntuhan akhlak dan moral dalam golongan remaja akan berkurang kerana mereka hanya dibenarkan menggunakan media sosial untuk kegunaan yang baik sahaja seperti berhubung dengan rakan, mencari maklumat berkaitan pelajaran dan sebagainya. Perkara ini perlu dicegah seperti peribahasa sediakan payung sebelum hujan agar tidak berlaku sebarang krisis akhlak dan moral dalam kalangan remaja.

Seterusnya, punca berlakunya krisis akhlak dan moral dalam kalangan remaja ialah masalah keluarga dan rumahtangga. Hal ini dikatakan demikian kerana, kebanyakan keluarga terutamanya ibu bapa sangat sibuk bekerja sehingga mengabaikan kasih sayang yang perlu dicurahkan terhadap anak-anak mereka. Disebabkan itu, kebanyakan remaja yang mempunyai krisis akhlak datang dari keluarga yang sentiasa sibuk dengan kerja kerana remaja ini tidak mendapat perhatian yang mencukupi sehingga boleh menjadi seorang yang agresif. Jika remaja itu datang dari keluarga yang mewah juga boleh menyebabkan remaja mengalami keruntuhan akhlak dan moral. Sebagai contoh, ibu bapa mereka memanja-manjakan mereka dengan memberikan wang saku yang berlebihan boleh menyebabkan anak-anak mereka terlibat dalam budaya hedonisme. Budaya ini sangat tidak murni jika diamalkan oleh seseorang individu terutamanya remaja. Bagi mencegah perkara ini berlaku, keluarga memainkan peranan yang penting bagi mendidik anak-anak mereka terutamanya remaja dengan memberikan perhatian dan mengajar mereka untuk berakhlak mulia walau di mana kita berada. Dengan berbuat demikian, remaja akan menjadi seseorang

yang sentiasa menghormati orang sekeliling dan tidak akan terlibat dengan perkara yang boleh meruntuhkan akhlak dan moral mereka.

Akhir sekali, punca berlakunya krisis akhlak dan moral dalam kalangan remaja ialah sistem pendidikan yang tidak holistik. Sistem pendidikan terutamanya di sekolah memainkan peranan yang penting bagi mendidik golongan remaja menjadi seorang yang cemerlang dari segi akademik, sukan dan akhlak. Sistem pendidikan yang baik mampu membentuk remaja menjadi individu yang boleh dijadikan sebagai contoh teladan yang baik pada masa akan datang. Namun, sistem pendidikan sekarang tidak menekankan akhlak, moral dan disiplin terhadap para pelajar. Mereka lebih fokus hanya untuk akademik dan sukan semata kerana ingin mengejar pangkat dan nama terbaik antara sekolah-sekolah. Menurut Datuk Seri Dr Mahathir Mohamad dalam akhbar Utusan Malaysia yang menegur sikap sesetengah guru yang tidak memberi pengajaran menyeluruh kepada murid, sebaliknya hanya menumpukan perhatian mengajar mata pelajaran yang ditugaskan kepada mereka. Perkara ini boleh menyebabkan golongan remaja alpa dan kurang berdisiplin serta boleh terjerumus dengan perkara yang boleh meruntuhkan akhlak. Bagi menangani perkara seperti ini berlaku, pihak sekolah hendaklah menekankan pendidikan moral dan agama bagi setiap pelajar. Bagi mencorakkan disiplin sekolah yang berkesan, semua guru harus menunjukkan komitmen dan diberi tanggungjawab bagi menguatkuasakan disiplin agar dapat membentuk sahsiah yang baik dalam kalangan murid.

Kesimpulannya, isu krisis akhlak dan moral dalam kalangan remaja ini merupakan isu yang perlu dititikberatkan dan memerlukan perhatian yang serius dari pelbagai pihak. Banyak punca yang telah dikupas dan langkah menanganinya krisis akhlak dan moral dalam kalangan remaja ini berlaku. Oleh itu, semua pihak wajarlah memainkan peranan penting dan hendaklah bekerjasama bagi aur dengan tebing bagi mengelakkan krisis akhlak dan moral dalam kalangan remaja ini berlaku. Usaha dan komitmen dari semua pihak juga dapat

membentuk generasi muda yang berakhlak mulia dan berkualitas tinggi bagi memastikan negara mempunyai masa depan yang cerah dan aman damai.

## Rujukan

1. <https://prpm.dbp.gov.my/Cari1?keyword=akhlak>
2. [https://www.researchgate.net/publication/361560133\\_Permasalahan\\_Keruntuhan\\_Akhlak\\_dalam\\_Kalangan\\_Remaja\\_Muslim\\_di\\_Malaysia\\_Isu\\_Cabaran\\_dan\\_Cadangan\\_Penyelesaian](https://www.researchgate.net/publication/361560133_Permasalahan_Keruntuhan_Akhlak_dalam_Kalangan_Remaja_Muslim_di_Malaysia_Isu_Cabaran_dan_Cadangan_Penyelesaian)
3. [https://bebasnews.my/2023/10/04/krisis-akhlak-kanak-kanak-remaja-membimbangkan/#google\\_vignette](https://bebasnews.my/2023/10/04/krisis-akhlak-kanak-kanak-remaja-membimbangkan/#google_vignette)
4. <https://www.bharian.com.my/bhplus-old/2015/05/50941/remaja-terpengaruh-media-sosial>
5. <https://www.ikim.gov.my/index.php/2014/12/24/tangani-institusi-keluarga-elak-keruntuhan-akhlak-remaja/>
6. [https://docs.google.com/document/d/1ZGrJ\\_sAYXoPyx\\_QK0QWTWWY9WGTEX0FyQ5vbzLVXQVM/edit](https://docs.google.com/document/d/1ZGrJ_sAYXoPyx_QK0QWTWWY9WGTEX0FyQ5vbzLVXQVM/edit)